

TEZAU LITURGIC

29 APRILIE

ACATISTUL SF. CUVIOS NECTARIE TIHONOV DE LA OPTINA



MOSCOVA, 2000



Акафист

святому преподобному

Нектарию Оптинскому

Кондак 1

Богоблаженному старцу Нектарию яко благоуханному крину Оптины пустыни, иже источает божественный нектар духовнаго жития и благовонит им Церковь Божию, похвальная принесем пения, ты же, отче богомудре, от моря суетствий и бед многоразличных избави стадо твое любовью тебе зовущее: Радуйся, блаженне Нектарие, Оптиной пустыни благоухание.

Икос 1

От корене благочестия процвел еси, отче Нектарие, потоки евангельскими напаяемь и страхом Божиим окормляемь издетска, яко непорочный агнец от матере в дар Богу принеслся еси, яко всесожжение тучное. Мы же воюю обоняюще трудов твоих, похвальная тебе зовем:

Радуйся, благочестивых родителей
процветение.

Радуйся, боголюбивых ревнителей
приращение.

Радуйся, добродетелей цветозлачное одеяние.

Радуйся, добровонное целомудрия помазание.

Радуйся, яко в дому Божии приметаяйся
издетска.

Радуйся, яко в раю сладости вчинивыйся
изрядне.

Радуйся, кореню, напояемый водами веры.

Радуйся, грозде источаяй вино надежды.

Радуйся, блаженне Нектарие, Оптиной
пустыни благоухание.

Кондак 2

Услышав отче яко в Оптиной пустыни
вертоград старчества Богом насажден бысть,
устремился еси вонь на крылах любомудрия и
почил еси на лузе скитском сладость вкушая
нектара духовнаго, Богу взывая: Аллилуиа.

Икос 2

Под крылома Предтечи водворивыйся отче Нектарие и в храме его яко на мысленном небе живый, послушанию церковному прилежал еси, яко ангельскому служению. Темже приносим тебе похвальное пение:

Радуйся, от Предтечи всыновление приемый.

Радуйся, от старцев вразумление получивый.

Радуйся, утварь мысленная храма Божия.

Радуйся, укорение чувственное греха гордости.

Радуйся, Ангельскими деяньми себе окрыливый.

Радуйся, иноческими добродетельми себе украсивый.

Радуйся, послушанием обретый миросветлый восход.

Радуйся, прилежанием открывый премирный восток

Радуйся, блаженне Нектарие, Оптиной пустыни благоухание.

Кондак 3

Яко розга, в оптинстей пустыни прозябл еси, отче Нектарие, напаяемь богомудрыми словесы старцев твоих, и в точиле послушания изгнетаемь, мсто сладчайшее искапал еси ношебденных твоих молитв, Богу поя: Аллилуиа.

Икос 3

В тесней храмине твоей аки в затворе пожил еси, отче Нектарие, духом присно в горнее восходя, о земных небрегл еси попечениих, обаче любомудрием душу твою аки златом богатыя. Темже сокровищем души твоея дивящися, сице тебе рцем:

Радуйся, ношебденных молитв светильниче.

Радуйся, днесветлых трудов проповедниче.

Радуйся, затворниче боголюбезнейший.

Радуйся, заступниче благодерзновеннейший.

Радуйся, яко во глубине безмолвия бисер обрел еси духовный.

Радуйся, яко в тишине безстрастия глас хлада явися ти тонка.

Радуйся, яко теснотою подвига широту обрел еси Рая.

Радуйся, яко высоты смирения глубины
избегл еси ада.

Радуйся, блаженне Нектарие, Оптиной
пустыни благоухание.

Кондак 4

В тишине безмолвия Богу поработал еси отче,
мира тщету и тину страстей отрясл еси, чистым
оком Божия тайны уведед еси богомудре, темже
чадам твоим заповедел еси во всем искать
великого смысла, Богу благодарне взывая:
Аллилуиа.

Икос 4

Сердце, яко книгу богописанну возымел еси,
отче, начертанием в нем Божиих таин и судеб.
Книжник явлься богомудрый, источаяй
познания нелестная, и напаяяй сладостию
божественною всех вопиющих тебе:

Радуйся, скрижале неписанная житейскими
письмены.

Радуйся, свитче исписанный тростию
благодати.

Радуйся, таин Божественных честное
вместилище.

Радуйся, судеб Господних таинниче
преизрядный.

Радуйся, несмысленных премудростию
Божественною умудривый.

Радуйся, мудрых века сего обличивый.

Радуйся, от камене Христа мед духовный
пивый.

Радуйся, от уст твоих сладость духовную
источивый.

Радуйся, блаженне Нектарие, Оптиной
пустыни благоухание.

Кондак 5

Сокровищница дарований духовных явился
еси Нектарие, ихже приял еси от богоносных
старцев твоих: от Амвросия научился еси
деянию, от Анатолия же видению, от самаго же
Господа приял еси молитву непрестанную, поя
Ему: Аллилуиа.

Икос 5

Егда старцем последним быти тя братия
избраша отче Нектарие, обаче по смирению
отрещися хотящу, старцев собор тебе в видении

предста, ихже совету внял еси, иго благое
приятя, темже похвальная услыши сия:

Радуйся, единомысленная крепосте верных.

Радуйся, избличивый немощь неверных.

Радуйся, собора старческаго присное
благоухание.

Радуйся, о Бозе крепкое явивый подвизание.

Радуйся, молитвою примиряй во вражде
сущих.

Радуйся, псаломски мудрствуй о вещех
пресущных.

Радуйся, видений небесных присный
созерцателю.

Радуйся, откровений Божественных
достойный хранителю.

Радуйся, блаженне Нектарие, Оптиной
пустыни благоухание.

Кондак 6

Страстей рубище отче Нектарие пращею
поста раздрал еси, бдением же ветхих риз
совлекся еси, темже ризы испещренны
добродетельми тебе истка благодать Святаго
Духа, в нюже облекся еси, поя: Аллилуиа.

Икос 6

Ум Христов стяжал еси богомудре Нектарие, совлечением мудрования мира сего, и явился еси любомудрия светильник светозарный. Темже просвети евангельским богоразумием вопиющих тебе сия:

Радуйся, очи херувимския стяжавый.

Радуйся, усты серафимския имевый.

Радуйся, пламенеющаго рачения светлость.

Радуйся, светлейшаго разсуждения ясность.

Радуйся, страстей угашая разжжение.

Радуйся, пламене добродетелей возжение.

Радуйся, премудрости Христовой таиниче.

Радуйся, любомудрия евангельскаго исполнение.

Радуйся, блаженне Нектарие, Оптиной пустыни благоухание.

Кондак 7

Умудрительное имел еси отче слово разрешающее всякий неправды союз, просиявающее же глубины душевныя и во отишие преводящее от бури скорбей. Темже

утешительным словом напитай чада твоих, вопиющих Христу: Аллилуиа.

Икос 7

Яко хотя безумие мира сего обличити богомудре Нектарие, буйством мнимым явил еси себе прикровен, юродством мудрым высокоумудрых изобличил еси суемудрие и к высоте благочестия привлекл еси от страстей безчестия вопиющих тебе сия:

Радуйся, Премудрости Божественная сладостное покоище.

Радуйся, немудрости мирския горчайшее позорище.

Радуйся, буйством проповеди Христа распята прославивый.

Радуйся, бегством покоища Христу сораспявыйся.

Радуйся, юродством мнимым обуил еси превозносящихся.

Рауйся, смиренномудрием многим умудрил еси себе умаляющия.

Радуйся, наперстниче премудрости и страже благочестия.

Радуйся, нектаре разумности истребляя нечестие.

Радуйся, блаженне Нектарие, Оптиной пустыни благоухание.

Кондак 8

Яко полная луна в ночи безбожия возсиял еси, богомудре Нектарие, исполняяй светом богоразумия притекающия к светлым советам твоим, тьмою же неверия ослепленные уверительными озарил еси чудесы. Темже просветившеся от тебе познанием Солнца Правды – Христа, вопием Ему: Аллилуиа.

Икос 8

Пророческою мастию помазан был еси благодатию Пресвятаго Духа якоже будущая ясно зрел еси яко настоящая, и советы сердечныя явил еси сокровенныя. Темже яко тайноглагольника ты вси вохваляем глаголюще:

Радуйся, таинниче Божественных промыслений.

Радуйся, светильниче сердечных намерений.

Радуйся, яко Царю предрекл еси венцем мученичества увязание.

Радуйся, яко Царству Российскому прорека еси венцем духовным облажение.

Радуйся, яко семь светильников прозрел еси в Оптиной сияющих.

Радуйся, яко семь столпов узрел еси в ней от земных недр восходящая.

Радуйся, будущего века яснозрителю блаженнейший.

Радуйся, настоящего времени тайновидче изряднейший.

Радуйся, блаженне Нектарие, Оптиной пустыни благоухание.

Кондак 9

Горчайший плод прозябе земли россиястей корень безбожия егда насажден бысть на благодатней пажити ея, обаче сладчайша явишася твоя пророчества егда утешал еси приходящая люди озлобленныя. Темже не престай утешая ны отче блаженне твоими богомудрыми реченьми, да Христу исторгшему корень безбожия поем: Аллилуия.

Икос 9

Посечен бысть безбожниками вертоград старчества, яко умалишася истина от земли, обаче яко о корень твоего юродства притупися серп безбожия, сего ради утвердися исповедание твое яко кедр ливанский. Мы же подвигом твоим укрепльшася, похвальная тебе зовем:

Радуйся, Божественная розго, плодящая грозд покаяния.

Радуйся, Божественная клеще исторгающая терн безбожия.

Радуйся, вино, веселящее заповеди творящих.

Радуйся, пище твердая добре подвизающимся.

Радуйся, меде духовный Божественных разумений.

Радуйся, млеко евангельское Божественных наставлений.

Радуйся, словеса источаяй и души верных напаяяй.

Радуйся, серп слова наостривый и безбожие искоренивый.

Радуйся, блаженне Нектарие, Оптиной пустыни благоухание.

Кондак 10

Яко корабль исполнен добродетелей в пристанище достигл еси безстрастия и оттуду в горняя ветрилом Духа преставился еси к старцам твоим идеже союзом любве связался еси со всеми святыми песнь преславную поя: Аллилуия.

Икос 10

В райских кущех ныне водворяешися блаженне Нектарие, и наслаждаешися блаженством несказанным и черплеши чистую воду жизни исходящую от Престола Божия. Темже в молитвах поминай тебе славящия и глаголющия сия:

Радуйся, небоходец Божественных селений.

Радуйся, подателю райских утешений.

Радуйся, небомудренных разумений произращение.

Радуйся, благочестивых обычаев насаждение.

Радуйся, добродетелей нектар источаяй.

Радуйся, добронравия аромат испущаяй.

Радуйся, изящное рая Божия удобрение.

Радуйся, изрядное черноризцев украшение.

Радуйся, блаженне Нектарие, Оптиной
пустыни благоухание.

Кондак 11

Сирь не потерпел еси нас, отче оставити,
темже мощми твоими возвратился еси во
обитель твою, юже облаговонил еси сладким
нектаром райским и чудесы преславными
украсил еси честную раку твою, к нейже
притекающи с верою исцеления приемлют
вопиюще Христу: Аллилуиа.

Икос 11

Неудержимою зарею от земных недр возсиял
еси, блаженне Нектарие, яко утро Божественное
озарил еси обитель твою солнцем незаходимым
притекл еси в ню мощми благодатными и семь
свещей вжег еси и таинств учредил еси
семь. Темже яко в дому Премудрости вси
почивающе велегласно ти зовем:

Радуйся, премудрости доме богозданный.

Радуйся, глупости храмину разрушивый.

Радуйся, седьмостолпная добродетелей
осново.

Радуйся, седмосвещниче храма Божия.

Радуйся, семи таинств церковных
благоговейный служителю.

Радуйся, семи столпов премудрости
разумливый ваятелю.

Радуйся, даров Духа Святаго одушевленная
хранительнице.

Радуйся, яко мощми твоими исцеляеши
болящия.

Радуйся, яко чудодейственную помощь
подаеши просящим.

Радуйся, блаженне Нектарие, Оптиной
пустыни благоухание.

Кондак 12

В Раю сладости процвел еси блаженне
Нектарие, приснославным твоим житием,
добродетелей мастикою намастился еси яже
изнесл еси от трудов твоих, темже токи
медоточныя нектара Божественнаго источи ты
прославляющим, и от души поющим Христу ты
прославившему: Аллилуиа.

Икос 12

Богомудрое о Бозе твое житие воспеваем
блаженне Нектарие, имже объюродил еси
безумие мира сего в мудрости же Божественней
преславное показал еси возрастание, темже
источи нам сладость Божественнаго познания
вопиющим тебе:

Радуйся, Божественныя радости сладость
вкушай.

Радуйся, мирских скорбей горечь истребляй.

Радуйся, мировоние Духа Святаго обоняй.

Радуйся, мудрование духа лукаваго обличай.

Радуйся, от Бога приемый дары
многообразныя.

Радуйся, имиже исцеляеши недуги
многоболезненныя.

Радуйся, яко тобою к Премудрости
Божественней приближихомся.

Радуйся, яко тобою безумий мирских
избегохом.

Радуйся, блаженне Нектарие, Оптиной
пустыни благоухание.

Кондак 13

О богоблаженне отче Нектарие, яко мирочестно стяжахом тя, яко благоуханный нектар воспеваем тя. Темже злосмрадных дел твоим предстательством избави нас и благоуханными твоими молитвами нас богоприятны Богу соделай да сладкогласно с тобою поем Ему: Аллилуиа.

(Этот кондак глаголи трижды, затем икос 1 и кондак 1)

Молитва

О Преподобне и богоблаженне отче Нектарие, присносветлый светильниче старчества оптинскаго! Юродство подъемый и безумие мира обличивый, от богоборных злоключения добльственне претерпевый и блаженства изгнанных ради Господа Иисуса вкусивый. Призри ныне с небесе и от Райскаго сада к нам приинки. Возвыси наше мудрование от земных попечений и о небеснем жительстве помышляти научи. Яко божественными добродетельми себе украсивый и плоды Райских сладостей непрестанное наслаждение вкусивый, от треволнения страстей и горших плодов грехолюбия нас исхити всеизрядным твоим

предстательством. В Вере Православной до последняго издыхания утверди ны стояти и по отеческим стопам и преданием св. Апостол умудри ны ходити.

Господа и Бога умоли, богомудре отче, от грядущаго антихриста и от коварных его сетей нас избавити и в сокровенней пустыни спасения нас вселити. Да тихое, мирное и благочестное житие в веце сем скончаем и Райских селений по твоим молитвам наследити сподобимся. Идеже купно с тобою и со старцы оптинскими воспоем и прославим Безначальную и Нераздельную и Единосущную Троицу, Отца и Сына и Святаго Духа во веки веков. Аминь.

